

Reglament d'absenzas

dalla scola primara e secundara Scolaviva

Basa legala

Lescha davart las scolas popularas dil cantun Grischun, incl. ordinaziun, dils 21 da mars 2012
(DG 421.000, DG 421.010)

Art. 1 Principi

¹ Las personas responsablas per l'educaziun ein obligadas da tarmetter a scola ils affons regularmein e punctualmein. Senza motiv stringent astga l'instrucziun buca vegnir tralascada.

² Eis ei buca pusseivel da frequentar la scola, sto quei vegnir communicau alla persuna d'instrucziun responsabla avon l'entschatta dallas lecziuns.

Art. 2 Noziuns

Absenza: muncar l'instrucziun nunprevisiblamein, a cuorta vesta ed excepziunalmein.

Congedi: muncar l'instrucziun previsiblamein, a moda planisada ed excepziunala.

Dispensaziun: sedispensar dall'instrucziun regularmein ni repetidamein.

Art. 3 Absenzas

¹ Absenzas vegnan perstgisadas en cass da:

- a) malsogna ni accident dalla scolara/dil scolar;
- b) greva malsogna/grev accident da confamigliars ni autras personas da relaziun che stattan datier;
- c) vias nunpassablas;
- d) mort d'in confamigliar ni d'in'otra persuna da relaziun che stat datier e sepultura da tierparents ni d'autras personas da relaziun che stattan datier.

² La representanza legala ei responsabla che la persuna d'instrucziun dalla classa ei orientada dall'absenza dil scolar/dalla scolara avon l'entschatta dall'instrucziun.

³ El cass ch'il scolar/la scolara maunca pervia da malsogna ni accident pli che treis dis sa la persuna d'instrucziun pretender dalla persuna responsabla per l'educaziun in attestat medicinal per mauns dallas actas da scola.

Art. 4 Dis da joker

¹ Las personas responsablas per l'educaziun san prender lur affon duront maximalmein 4 mez dis digl onn da scola ord l'instrucziun. Exclut da quella retratga ei il temps immediatamein avon e suenter las vacanzas da stad.

² Dalla retratga dils dis da joker han las personas responsablas per l'educaziun d'annunziar alla persuna d'instrucziun dalla classa per regla in'jamna avon ed a scret.

³ Per las suandontas absenzas ston ins buca duvrar ils dis da joker:

Visetas tiel miedi ni dentist ch'ei apparentamein ni tenor conferma dil miedi buca pusseivlas ordeifer il temps d'instrucziun. Quei vala era per examinaziuns dil Surveysch psicologic ed auters posts ufficials.

Art. 5 Congedi

¹ Congedi motivau el senn da dispensaziuns da scolaras e scolars dall'instrucziun sa vegnir concediu tochen maximalmein 15 dis da scola (30 mez dis) d'in onn da scola. Avon che far ina damonda da congedi ein ils dis da joker da retrer.

² Damondas da congedi ein d'inoltrar silmeins 10 dis ordavon a scret alla persuna d'instrucziun dalla classa.

³ Ils dis da congedi concedi a scolaras e scolars san vegni lubi era en fuorma da lecziuns singulas. La dimensiun totala astga buca survargar 15 dis da scola ni il treidubel dalla dotaziun jamnila da lecziun dil scalem da scola corrispundent.

⁴ Absenzas motivadas san vegnir concedidas oravontut pils suandonts cass: mortori enteifer la famiglia; impurtontas occurrenzas religiusas; participaziun activa dalla scolara ni dil scolar a concurrenzas sportivas; concurrenzas artisticas ni scientificas; engaschi tier ina acziun en uffeci voluntari.

⁵ Absenzas dalla scola cun motiv personal sco p. ex. activitads dil temps liber, excursiuns ni viadis da vacanzas valan buca sco absenzas cun motiv cumprovau el senn da congedi. Excepti da quei ein ils dis da joker.

⁶ La cumpetenzza per lubir ils dis da congedi deleghescha il Consorzi da scola suandontamein:

dis da congedi per onn da scola	cumpetenzza	proposta
1. - 2. di	persunas responsablas per l'educaziun (dis da joker)	na
3. - 4. di	persuna d'instrucziun dalla classa	gie
5. - 9. di	direcziun dalla scola	gie
10.-15. di	Cussegl da scola	gie

⁷ Per damondas da congedi da dapli che 30 mez dis (15 dis da scola) ei gl'Inspectorat da scola cantunal cumpetents. Las damondas han las persunas responsablas per l'educaziun d'inoltrar a scret e cun motivaziun silmeins 20 dis ordavon agl Inspectorat da scola.

Art. 6 Dispensa da lecziuns singulas

¹ Sin fundament d'in attestat medicinal sa la persuna d'instrucziun dispensar scolaras/scolars da singulas lecziuns. La survegionza duront gl'urari usitau vegn garantida en cunvegnientscha cullas persunas responsablas per l'educaziun. Visetas tiel miedi ni dentist ein da planisar da principi sin in termin ordeifer il temps d'instrucziun.

Art. 7 Communicaziun e controlla

¹ Las persunas d'instrucziun dalla classa ein d'informar schi baul sco pusseivel ed a scret dallas absenzas da scola.

² Las persunas d'instrucziun dalla classa meinan ina controlla dallas absenzas da scola.

³ Immediatamein suenter ina assenza ha la scolara resp. il scolar da presentar alla persuna d'instrucziun dalla classa gl'import el carnet d'absenzas che sto esser suttascrets dallas persunas responsablas per l'educaziun.

Art. 8 Emprindissadis d'emprova

¹ Emprindissadis d'emprova (fuffernadis) dueien vegnir absolvi sche pusseivel ellas vacanzas da scola. Tier in basegn motivau eis ei era pusseivel d'absolver quels duront il temps d'instrucziun. Las lubientschas conceda la direcziun dalla scola.

Art. 9 Dispensaziuns

¹ Dispensaziun vul dir che scolaras/scolars vegnan liberai dall'instrucziun sin fundament da circumstanzias extraordinarias e/ni gravontas che pretendan in agir spert pil bien d'ina scolara/in scolar, ni per mantener il menaschi da scola, e che san buca vegnir tractadas en connex cun ina exclusiun dalla scola. Davart ina dispensaziun parziala ni completa dall'instrucziun decida gl'Inspectorat da scola sin fundament d'ina proposta a scret dil Consorzi da scola e cun involver las persunas responsablas per l'educaziun.

Art. 10 Finiziun anticipada da la scola

¹ Sebasond sin art. 10 dall'Ordinaziun cantunala da scola ei ina finiziun anticipada dalla scola obligatorica avon la fin dil 9avel onn da scola pusseivla mo en cass excepziunals.

Art. 11 Prender suenter la materia d'instrucziun munchentada

¹ Las scolaras ed ils scolars resp. las personas responsablas per l'educaziun ein responsablas da prender suenter la materia d'instrucziun munchentada.

² La persona d'instrucziun sa disponer da prender suenter examens munchentai.

Art. 12 Disposiziuns penalas

¹ Geniturs che tarmettan sapientivamein buca a scola regularmein lur affon senza motiv da perstgisa, ni che prendan quel ord scola senza lubientscha da congedi, castigia il Cussegl da scola cun ina multa tochen 5'000 francs.

² Las personas d'instrucziun ein obligadas d'annunziar absenzas nunlubidas alla direcziun dalla scola.

³ Absenzas nunperstgisadas vegnan risguardadas el giudicament da criteris «Observar las reglas dalla convivenza da scola» digl attestat.

Art. 13 Recuors

¹ Recuors pertuccont damondas da congedi refusadas tracta il Cussegl da scola enteifer 10 dis.

² Encunter disposiziuns e decisiuns dil Cussegl da scola sa vegnir recurriu enteifer 10 dis al Departament cantunal d'educaziun, cultura ed ambient dil cantun Grischun.
Recuors ein d'inoltrar a scret e cun motivaziun.

Art. 14 Entrada en vigur

¹ Quest reglament d'absenzas rempiazza la versiun dils 12 da december 2016 ed entra en vigur igl 1. d'uost 2021.

Quest reglament ha il Consorzi dalla scola primara e superiura dalla Scolaviva approbau ils 15 da zercladur 2021.



Mirjam Carigiet

presidenta dil Cussegl da scola
dil Consorzi da scola primara
dallas vischnauncas Laax e Falera



Ralf Luck

president dil Cussegl da scola
dil Consorzi da scola superiura
dallas vischnauncas Falera, Laax, Sagogn e Schluein